



## OS PROGRAMAS DE GALICIA DA POLÍTICA DE COHESIÓN DA UNIÓN EUROPEA 2021-2027



## II. OS PROGRAMAS DE GALICIA DA POLÍTICA DE COHESIÓN DA UNIÓN EUROPEA 2021-2027

### II.1. INTRODUCCIÓN

A política de cohesión é a principal política de investimento da Unión Europea. Contribúe a reforzar a cohesión económica, social e territorial e o seu obxectivo é corrixir os desequilibrios entre países e rexións, atendendo ás prioridades políticas da Unión, especialmente as transicións verde e dixital.

Para acadar estes obxectivos e abordar as diversas necesidades de desenvolvemento en todas as rexións da UE asignáronse, dentro do **Marco Financeiro Plurianual (MFP)**, 337.735 millóns de euros a prezos de 2018, case un terzo do mesmo.

A adopción definitiva do paquete legislativo da política de cohesión para 2021-2027, polo Consello o 28 de maio, e a súa aprobación polo pleno do Parlamento Europeo, o 23 de xuño de 2021, marca a etapa final do procedemento legislativo e permite a entrada en vigor da lexislación sobre cohesión o 1 de xullo.

As principais novidades da política de cohesión 2021-2027 son:

- O apoio ás prioridades da Unión Europea concretadas en cinco obxectivos políticos:

a) unha **Europa máis competitiva e intelixente**, promovendo unha transformación económica innovadora e intelixente e unha conectividade rexional ás tecnoloxías da información e das comunicacións;

b) unha **Europa máis verde**, baixa en carbono, en transición cara a unha economía con cero emisións netas de carbono e resiliente, promovendo unha transición enerxética limpa e equitativa, o investimento verde e azul, a economía circular, a mitigación e adaptación ao cambio climático, a prevención e xestión de riscos e a mobilidade urbana sustentable;

c) unha **Europa máis conectada**, mellorando a mobilidade;

d) unha **Europa máis social e inclusiva**, por medio da aplicación do alicerce europeo de dereitos sociais;

e) unha **Europa máis próxima aos seus cidadáns**, fomentando o desenvolvemento integrado e sustentable de todo tipo de territorios e iniciativas locais.

- A **concentración temática** nos obxectivos máis relevantes para unha Europa competitiva e orientada ao futuro, con contribucións mínimas nacionais aos obxectivos climáticos.

- Aplicación do **principio de «non causar danos significativos»** aos obxectivos medioambientais.

- A definición dun obxectivo político concreto aplicado unicamente a través de estratexias de **desenvolvemento territorial e local**.

- **Simplificación**, que implica entre outros aspectos, informes máis sinxelos e frecuentes, controis máis lixeiros dos programas, ampliación da posibilidade de utilizar opcións de custos simplificados e financiamento non vinculado aos sistemas de custos.

- Establecemento dunha lista limitada de **condicións favorecedoras** co fin de garantir os requisitos previos necesarios para o uso eficaz e eficiente da axuda da Unión concedida polos Fondos.

- Programación flexible adaptada aos novos retos e necesidades emerxentes coa asignación do importe da **flexibilidade**, correspondente ao 50% da contribución para os exercicios 2026 e 2027, despois da revisión intermedia da situación socioeconómica e os posibles novos retos.

- Disposicións reforzadas en materia de visibilidade e **comunicación**.

- A **porcentaxe de cofinanciamento** do obxectivo de investimento en emprego e crecemento a nivel de cada prioridade, non superará as porcentaxes seguintes: o 85 % para as rexións menos desenvolvidas; o 70 % para as rexións en transición clasificadas como rexións menos desenvolvidas no período 2014-2020; o **60 % para as rexións en transición**; o 50 % para as rexións máis desenvolvidas clasificadas como rexións en transición ou cun PIB per cápita inferior ao 100 % no período 2014-2020 e o 40 % para as rexións máis desenvolvidas.

- Os recursos do FEDER e do FSE+ destinados ao obxectivo de investimento en emprego e crecemento asignaranse entre as seguintes **tres categorías de rexións** de nivel NUTS 2:

a) **rexións menos desenvolvidas**, cuxo PIB per cápita sexa inferior ao 75% do PIB medio per cápita da UE-27;


b) **rexións en transición**, cuxo PIB per cápita estea entre o 75% e o 100% do PIB medio per cápita da UE-27;

c) **rexións máis desenvolvidas**, cuxo PIB per cápita sexa superior ao 100 % do PIB medio per cápita da UE-27.

A clasificación das rexións nunha das tres categorías de rexión determinarase en función da relación entre o PIB per cápita de cada rexión, medido en niveis de poder adquisi-

tivo e calculado sobre a base das cifras da Unión correspondentes ao período 2015-2017, e o PIB medio per cápita da UE-27 no mesmo período de referencia.

Mapa 1. Clasificación das rexións europeas por categorías no período 2021-2027



Fonte: Comisión Europea

A política de cohesión desenvólvese a través dos seguintes fondos específicos:

- o **Fondo Europeo de Desenvolvemento Rexional (FEDER)** para investir no desenvolvemento social e económico de todas as rexións e cidades da UE,
- o **Fondo de Cohesión (FC)**, para investir no medio ambiente e transporte nos países menos prósperos da UE,
- o **Fondo Social Europeo Plus (FSE+)** para apoiar o emprego e crear unha sociedade xusta e socialmente inclusiva nos países da UE

- e o **Fondo de Transición Xusta (FTX)** para apoiar ás rexións máis afectadas pola transición cara á neutralidade climática.

No caso da nosa comunidade non se recibe financiamento do FC debido a que España supera o 90% da renda nacional bruta per cápita media europea.

## II.2. AS CIFRAS DA POLÍTICA DE COHESIÓN

Os recursos para a cohesión económica, social e territorial dispoñibles para compromisos orzamentarios no período 2021-2027 dentro do marco financeiro plurianual ascenden a 330.235 millóns de euros en prezos de 2018, para o FEDER, o FSE+ e o Fondo de Cohesión, e a 7.500 millóns de euros en prezos de 2018 para o Fondo de Transición Xusta. Os recursos do FTX complétanse con 10.000 millóns de euros que constituirán ingresos externos procedentes do Instrumento Europeo de Recuperación (Next Generation-EU), e como tales, poñeranse a disposición no período 2021-2023. En definitiva, os recursos totais da Política de Cohesión para o período 2021-2027 ascende a 347.735 millóns de euros (prezos de 2018).

Ademais da perspectiva por tipo de fondo, os **recursos do MFP para a política de cohesión** destínanse a dous obxectivos: Inversión en emprego e crecemento e cooperación territorial europea (Interreg). Así, os recursos de MFP destinados ao **obxectivo «Investimento en crecemento e emprego»** ascenderán a un total de 339.685 millóns de euros (a prezos de 2018) e asignaranse do seguinte xeito:

- a) 202.227 millóns EUR para as rexións menos desenvolvidas;
- b) 47.772 millóns EUR para as rexións en transición;
- c) 27.203 millóns EUR para as rexións máis desenvolvidas;
- d) 42.556 millóns EUR para os Estados membros que reciben axudas do Fondo de Cohesión (dos que 10.000 millóns EUR destinaranse ao Mecanismo «Conectar Europa»);
- e) 1.928 millóns EUR en concepto de financiamento adicional para as rexións ultra-periféricas;
- f) 500 millóns EUR para investimentos interrexionais en innovación.
- g) 17.500 millóns EUR para o Fondo de Transición Xusta (7.500 do MFP e 10.000 millóns de euros procedentes do Instrumento Europeo de Recuperación)

Por outro lado, os recursos procedentes do FEDER correspondentes á **obxectivo «Cooperación territorial europea»** ascenderán a un total de 8.050 millóns EUR e asignaranse como segue:

- a) 5.812 millóns EUR para a cooperación transfronteiriza marítima e terrestre;
- b) 1.466 millóns EUR para a cooperación transnacional;
- c) 490 millóns EUR para a cooperación interrexional;
- d) 281 millóns EUR para a cooperación coas rexións ultraperiféricas.

Táboa 1. Recursos da Política de Cohesión 2021-2027 por tipo de fondo. Millóns de euros a prezos de 2018

Fondo	MFP	NGEU	TOTAL
FEDER	200.360		200.360
FSE+	87.319		87.319
Fondo de Cohesión	42.556		42.556
Fondo de Transición Xusta	7.500	10.000	17.500
<b>TOTAL</b>	<b>337.735</b>	<b>10.000</b>	<b>347.735</b>

Fonte: Consellería de Facenda e Administración Pública

Táboa 2. Recursos da Política de Cohesión 2021-2027 por obxectivo. Millóns de euros a prezos de 2018

Obxectivos	MFP	NGEU	TOTAL
<b>Obxectivo de inversión en emprego e crecemento</b>	<b>329.685</b>	<b>10.000</b>	<b>339.685</b>
Rexións menos desenvolvidas	202.227		202.227
Rexións en transición	47.772		47.772
Rexións máis desenvolvidas	27.203		27.203
Fondo de Cohesión	42.556		42.556
Financiamento adicional rexión ultraperiféricas	1.928		1.928
Inversións interrexionales en innovación	500		500
Fondo de Transición Xusta	7.500	10.000	17.500
<b>Obxectivo de Cooperación Territorial</b>	<b>8.050</b>		<b>8.050</b>
Cooperación transfronteiriza	5.812		5.812
Cooperación transnacional	1.466		1.466
Cooperación interrexional	490		490
Cooperación coas rexións ultraperiféricas	281		281
<b>TOTAL</b>	<b>337.735</b>	<b>10.000</b>	<b>347.735</b>

Fonte: Consellería de Facenda e Administración Pública

A asignación financeira que recibirá España dentro dos recursos da Política de Cohesión, ascende a 32.178 millóns de euros (prezos de 2018), o que representa un 9,5 do total da UE. Dos fondos FEDER e FSE+ disporá do 10,7% (21.492 M€) e 11,3% (9.896 M€) do total, respectivamente, mentres que do Fondo Transición Xusta correspóndelle o 4,5% (790 M€). Por outro lado, a renda nacional bruta per cápita de España, medida en niveis de poder adquisitivo, supera o 92% da media per cápita da UE-27, e polo tanto España non é receptor da axuda do Fondo de Cohesión.

Recentemente, o Ministerio de Hacienda e Función Pública comunicou a asignación por comunidade autónoma dos fondos europeos da política de cohesión para o obxectivo de inversión en emprego e crecemento (FEDER, FSE e FTX).

Galicia ten asignado un montante global de 2.896 millóns de euros a prezos de 2018 (3.261 millóns de euros a prezos correntes), distribuídos do seguinte xeito:

a) 1.892 millóns EUR do FEDER a prezos de 2018 (non inclúe a territorialización dos recursos asociados ao obxectivo de cooperación territorial europea).

b) 903 millóns EUR para o FSE+ a prezos de 2018, que representa o 32,3% do total dos fondos estruturais (FEDER e FSE+).

c) 101 millóns EUR do Fondo de Transición Xusta asignados ao territorio da provincia da Coruña.

En definitiva, a asignación a Galicia dos fondos estruturais (FEDER e FSE+), para o obxectivo de inversión en emprego e crecemento, é de 2.795 millóns de euros. En termos absolutos, é tras Andalucía a comunidade autónoma que recibe máis fondos.

O tramo rexional, correspondente á xestión da Comunidade Autónoma de Galicia na devandita asignación, é do 44,1%, o que significa que se programarán 834 millóns no programa operativo FEDER de Galicia 2021-2027 (940 M€ a prezos correntes) e 398 millóns de euros no programa operativo FSE+ de Galicia 2021-2027 (449 M€ a prezos correntes).

Respecto ao anterior período 2014-2020, no que os recursos asignados a Galicia ascenderon a 2.930 M€ a prezos correntes do período 2014-2020 (FEDER, FSE, Iniciativa de Emprego Xuvenil e FEAD) e a Xunta xestionou o 44,3% dos mesmos, tanto a asignación global como o montante xestionado pola Xunta no período 2021-2027 presentará un descenso próximo ao 5%.

En termos per cápita, Galicia recibirá 1.034€ por habitante para o conxunto do período 2021-2027 a prezos de 2018, un 59% superior á media do conxunto do Estado, e un 62,5% superior á media das rexións en transición.




Táboa 3. Asignación territorial dos recursos da Política de Cohesión 21-27 para o obxectivo de inversión en emprego e crecemento

Tipoloxía de rexión	Comunidade autónoma	Asignación total prezos 2018 (M€)	Tramo rexional	Tramo Adm. Xeral do Estado	Poboación (millóns persoas)	Asignación per cápita € prezos 2018
Menos desenvolvidas	Estremadura	2.418	1.344	1.381	1,062	2.277
Menos desenvolvidas	Andalucía	11.277	5.535	7.175	8,478	1.330
Menos desenvolvidas	Cidade Autónoma de Melilla	96	45	63	0,084	1.134
Transición	Canarias	2.471	1.157	1.628	2,237	1.105
Menos desenvolvidas	Castela-a Mancha	2.182	1.069	1.390	2,046	1.067
<b>Transición</b>	<b>Galicia</b>	<b>2.795</b>	<b>1.389</b>	<b>1.761</b>	<b>2,703</b>	<b>1.034</b>
Menos desenvolvidas	Cidade Autónoma de Ceuta	87	40	58	0,084	1.034
Transición	Región de Murcia	1.092	508	723	1,505	726
	<b>ESPAÑA</b>	<b>30.781</b>	<b>16.165</b>	<b>18.527</b>	<b>47,333</b>	<b>650</b>
Transición	Principado de Asturias	518	395	189	1,019	509
Transición	Castilla y León	1.069	525	680	2,401	445
Transición	Comunidad Valenciana	2.194	1.063	1.410	5,029	436
Transición	Illes Balears	430	251	234	1,211	355
Transición	Cantabria	165	116	70	0,582	283
Transición	La Rioja	85	59	37	0,316	270
Máis desenvolvidas	Aragón	320	223	138	1,330	241
Máis desenvolvidas	Cataluña	1.821	1.241	811	7,652	238
Máis desenvolvidas	Comunidad de Madrid	1.309	892	583	6,747	194
Máis desenvolvidas	País Vasco	353	245	153	2,189	161
Máis desenvolvidas	Comunidad Foral de Navarra	98	68	43	0,657	150

Fonte: Ministerio de Hacienda e Función Pública

Deste xeito, reciben máis financiamento por habitante que Galicia, as rexións menos desenvolvidas, salvo Ceuta que é similar, e Canarias, que recibe un financiamento adicional por ser rexión ultraperiférica.

Mapa 2. Asignación territorial por habitante dos recursos da Política de Cohesión 21-27 para o obxectivo de inversión en emprego e crecemento



Fonte: Ministerio de Hacienda e Función Pública

## II.3. OS PROGRAMAS REXIONAIS DE GALICIA DA POLÍTICA DE COHESIÓN 2021-2027

### II.3.1. Programa FEDER de Galicia 21-27

O FEDER ten por obxecto reforzar a cohesión económica, social e territorial na Unión Europea corrixindo os desequilibrios entre as súas rexións. En 2021-2027, permitirá investir nunha Europa máis intelixente, máis ecolóxica, máis conectada e máis social que esta máis preto dos seus cidadáns.

O FEDER financia programas en réxime de responsabilidade compartida entre a Comisión Europea e as autoridades nacionais e rexionais dos Estados membros. As administracións dos Estados membros elixen que proxectos financiar e asumen a responsabilidade da súa xestión.

No período 2021-2027 e de conformidade cos obxectivos políticos da UE, o fondo apoiará os seguintes obxectivos específicos:

○ desenvolvemento e mellora das capacidades de investigación e innovación, o apoio ás pequenas e medianas empresas, o desenvolvemento de capacidades para a especialización intelixente, a transición industrial e así como a dixitalización e a conectividade dixital.

○ fomento da eficiencia enerxética e as enerxías renovables; a adaptación ao cambio climático; a resiliencia e a prevención do risco de catástrofes; o fomento do acceso á auga e dunha xestión hídrica sostible; o fomento da transición cara unha economía circular e eficiente no uso dos recursos; o fomento da protección e conservación da natureza, a biodiversidade e as infraestruturas ecolóxicas; por último, o fomento da mobilidade urbana multimodal sostible.

Máis conectadas mediante a desenvolvemento e reforzo dunha mobilidade sostible, resiliente, intelixente e intermodal.

Máis social, apoiando, fundamentalmente mediante infraestruturas, o emprego efectivo e integrador, a educación, as capacidades, a inclusión social e a igualdade de acceso á asistencia sanitaria, así como a mellora do papel da cultura e o turismo sostible.

Máis preto dos cidadáns, apoiando o desenvolvemento social, económico e medioambiental integrado e inclusivo en zonas urbanas e non urbanas.

En base ao seu grao de desenvolvemento, todas as rexións e Estados membros concentrarán o apoio nunha Europa máis competitiva e intelixente (obxectivo político — OP 1), así como nunha transición máis ecolóxica e con baixas emisións de carbono cara a unha economía neutra desde o punto de vista do clima e unha Europa resiliente (OP2). No caso de Galicia, deberá asignar como mínimo, o 40 % dos seus recursos do FEDER ao OP 1, e, como mínimo, o 30 % ao OP 2.

Ademais, todas as rexións e Estados membros tamén concentrarán polo menos o 8 % da súa asignación ao desenvolvemento urbano, e tamén se espera que as operacións no marco do FEDER contribúan co 30 % da dotación financeira global aos obxectivos climáticos.

No momento do peche deste documento o programa FEDER de Galicia 21-27 non está aprobado polo que a información que se presenta a continuación corresponde ao último borrador do programa enviado á Comisión. O programa definitivo podería sufrir algunha modificación.

○ importe do programa FEDER de Galicia 21-27 ascende a 940 millóns de euros en termos correntes. Sen considerar a asistencia técnica o importe é de 904 millóns de euros. Se temos en conta os obxectivos políticos este importe repártese do seguinte xeito:

Un 44,3% dos recursos destínanse ao OPI, unha Europa máis competitiva e intelixente, promovendo unha transformación económica innovadora e intelixente e unha


conectividade rexional ás tecnoloxías da información e das comunicacións; isto supón un importe de 400,7 millóns de euros

○ OP2, unha Europa máis verde, baixa en carbono, en transición cara a unha economía con cero emisións netas de carbono e resiliente, promovendo unha transición enerxética limpa e equitativa, o investimento verde e azul, a economía circular, a mitigación e adaptación ao cambio climático, a prevención e xestión de riscos e a mobilidade urbana sustentable; dispón dunha asignación de 365,9 millóns de euros. Isto supón o 40,5% do total

○ 6,7% dos recursos destínase ao OP3, unha Europa máis conectada, mellorando a mobilidade, cun importe de 61 millóns de euros

Por último, o OP4, unha Europa máis social e inclusiva, por medio da aplicación do alicerce europeo de dereitos sociais, supón o 8,5% do programa ao financiar proxectos por un valor de 76,5 millóns de euros.

Gráfico 1. Importe por obxectivo político da asignación financeira do Programa FEDER Galicia 21-27



Fonte: Consellería de Facenda e Administración Pública

○ programa distribúe o financiamento en 14 obxectivos específicos que son os seguintes:

○ OE11. O desenvolvemento e a mellora das capacidades de investigación e innovación e a implantación de tecnoloxías avanzadas: 151,0 millóns de euros

○ OE12. O aproveitamento das vantaxes da dixitalización para os cidadáns, as empresas, as organizacións de investigación e as administracións públicas: 169,7 millóns de euros

○ OE13. O reforzo do crecemento sostible e a competitividade das PEMES e a creación de emprego nestas, tamén mediante investimentos produtivos: 80,0 millóns de euros

○ OE21. O fomento da eficiencia enerxética e a redución das emisións de gases de efecto invernadoiro: 159,1 millóns de euros

○ OE22. O fomento das enerxías renovables de conformidade coa Directiva (UE) 2018/2001, en particular os criterios de sustentabilidade que se detallan nela: 33,0 millóns de euros

OE23. O desenvolvemento de sistemas, redes e equipos de almacenamento de enerxía intelixentes á marxe da rede transeuropea de enerxía ( RTE E): 7,0 millóns de euros

OE24. O fomento da adaptación ao cambio climático, a prevención do risco de catástrofes e a resiliencia, tendo en conta os enfoques baseados nos ecosistemas: 52,9 millóns de euros

OE25. O fomento do acceso á auga e dunha xestión hídrica sostible: 85,0 millóns de euros

OE26. O fomento da transición cara a unha economía circular e eficiente no uso de recursos: 7,5 millóns de euros

OE27. O fomento da protección e a conservación da natureza, a biodiversidade e as infraestruturas ecolóxicas (en diante, «infraestruturas verdes»), tamén nas zonas urbanas, e a redución de toda forma de contaminación: 21,5 millóns de euros


OE32. O desenvolvemento e o reforzo dunha mobilidade sostible, resistente ao cambio climático, intelixente e intermodal a escala nacional, rexional e local, que inclúe a mellora do acceso á RTE T e da mobilidade transfronteiriza: 61,0 millóns de euros

OE42. A mellora do acceso igualitario a servizos inclusivos e de calidade no ámbito de educación, formación e aprendizaxe permanente mediante o desenvolvemento de infraestruturas accesibles, inclúe fomento de resiliencia da educación e formación en liña e a distancia: 12,5 millóns de euros

OE45. A garantía da igualdade de acceso á asistencia sanitaria, reforzando a resiliencia dos sistemas sanitarios, incluída atención primaria, e fomentando a transición da asistencia institucional á asistencia nos ámbitos familiar e local: 46,0 millóns de euros

OE46. O reforzo do papel da cultura e o turismo sostible no desenvolvemento económico, a inclusión social e a innovación social: 18,0 millóns de euros

Gráfico 2. Importe por prioridade e obxectivo específico da asignación financeira do Programa FEDER Galicia 21-27



Fonte: Consellería de Facenda e Administración Pública

### II.3.2. Programa FSE+ Galicia 21-27

O novo FSE+ seguirá sendo o principal instrumento da UE para investir nas persoas: abordar as consecuencias socioeconómicas da pandemia de COVID-19, promover altos niveis de emprego, construír protección social e desenvolver unha forza laboral capacitada e resiliente lista para a transición a unha economía verde e dixital.

Cos recursos dispoñibles para o FSE+ se apoiará a implementación do Piar Europeo de Dereitos Sociais, proclamado conxuntamente polo Consello, o Parlamento Europeo e a Comisión, como a folia de ruta da UE para responder aos desafíos sociais en Europa. Así, o FSE+ axudará ás persoas, ás rexións e aos Estados membros a afrontar distintos retos, desde a recuperación da pandemia actual ata o cumprimento dos obxectivos da UE en materia de emprego, inclusión social, educación e clima.

O FSE+ integra o antigo Fondo Social Europeo (FSE), a Iniciativa de Emprego Xuvenil (YEI), o Fondo de Axuda Europea para os Máis Desfavorecidos (FEAD) e o Programa da UE para o Emprego e a Innovación Social (EaSI), o que permite utilizar os fondos da maneira máis eficiente e coherente posible. Investirá nas seguintes áreas prioritarias:

Apoiar á mocidade que se veu particularmente afectada pola crise da COVID-19, deste xeito, os recursos do FSE+ axudarán a que atopen unha cualificación, un traballo de boa calidade e a mellorar a súa educación e formación.

Axudar aos nenos necesitados mediante a asignación de recursos do FSE+ a accións específicas para combater a pobreza infantil e apoiar aos máis vulnerables da sociedade que sofren perdas de emprego e redución de ingresos, incluída a provisión de alimentos e asistencia material básica aos máis desfavorecidos.

Recapacitar e capacitar ás persoas para a transición a unha economía verde e dixital.

Creación de capacidade para interlocutores sociais e organizacións da sociedade civil.

Cooperación transnacional para promover a innovación social na UE.

Apoio directo pola Comisión Europea á innovación social no marco do capítulo Emprego e Innovación Social (EaSI).

No que se refire á concentración temática, os Estados membros asignarán polo menos o 25 % dos seus recursos do capítulo do FSE+ en réxime de xestión compartida, aos obxectivos específicos relacionados co ámbito estratéxico da inclusión social. Ademais, un mínimo do 5 % dos seus recursos para apoiar as accións específicas e as reformas estruturais necesarias para loitar contra a pobreza infantil. Por último, asignarase polo menos un 3% a facer fronte á privación material mediante alimentos e/ou a prestación de asistencia material básica ás persoas máis desfavorecidas, en particular aos menores, e establecer medidas de acompañamento que apoiem a súa inclusión social.

Ao igual que sucede co FEDER 21-27 o programa FSE+ de Galicia 21-27 non está aprobado, polo que a información que se presenta a continuación corresponde ao último borrador do programa enviado á Comisión. O programa definitivo podería sufrir algunha modificación.

O importe do programa FSE+ de Galicia 21-27 ascende a 449 millóns de euros en termos correntes. Sen considerar a asistencia técnica o importe é de 431,3 millóns de euros. Todas as actuacións están encaixadas no obxectivo político 4 e se temos en conta as prioridades este importe repártese do seguinte xeito (as porcentaxes non teñen en conta a asistencia técnica):

Un 25,9% dos recursos destínanse á prioridade 1: Emprego, adaptabilidade, emprendemento e economía Social, isto supón un importe de 111,7 millóns de euros

Á prioridade 2: Inclusión social e loita contra a pobreza, asígnanselle 109,3 millóns de euros. Isto supón o 25,4% do total


○ 25,0% dos recursos destínase á prioridade 3: Educación e Formación, cun importe de 108 millóns de euros

A prioridade 5: Emprego xuvenil, supón o 12,5% do programa ao financiar proxectos por un valor de 54,0 millóns de euros.

○ 3,3% dos recursos destínase á prioridade 6: Innovación social, cun importe de 14,4 millóns de euros

Por último, a prioridade 7: Garantía Infantil, supón o 7,9% do programa ao financiar proxectos por un valor de 34,0 millóns de euros.

Gráfico 3. Importe por prioridade da asignación financeira do Programa FSE+ Galicia 21-27



Fonte: Consellería de Facenda e Administración Pública

○ programa distribúe o financiamento en 14 obxectivos específicos que son os seguintes:

OE 4a. Eficacia dos mercados de traballo e o acceso ao emprego de calidade: 139,6 millóns de euros

OE 4b. Modernizar institucións e servizos do mercado de traballo: 31,8 millóns de euros

OE 4c. Promover unha participación equilibrada de xénero no mercado de traballo: 22,7 millóns de euros

OE 4d. Promover adaptación dos traballadores: 3,0 millóns de euros

OE 4e. Mellorar a calidade, inclusividade, eficacia e pertinencia para o mercado laboral dos sistemas de educación y formación: 12,0 millóns de euros

OE 4f. Promover a igualdade de acceso a unha educación e unha formación de calidade e inclusivas: 90,0 millóns de euros

OE 4g. Promover a aprendizaxe permanente: 6,0 millóns de euros

OE 4h. Fomentar a inclusión activa: 58,3 millóns de euros



OE 4i. Integración socioeconómica de nacionais de terceiros países: 11,8 millóns de euros

OE 4j. Integración socioeconómica de poboación marxinada: 3,5 millóns de euros

OE 4k. Igualdade de acceso a servizos de calidade, servizos sociais e sanitarios: 73,1 millóns de euros

OE 4l. Integración social de persoas en risco de exclusión social: 7,5 millóns de euros

*Gráfico 4. Importe por prioridade e obxectivo específico da asignación financeira do Programa FSE+ Galicia 21-27*

Fonte: Consellería de Facenda e Administración Pública

### **II.3.3. Fondo de Transición Xusta (FTX)**


○ Fondo de Transición Xusta é un instrumento clave para apoiar aos territorios máis afectados pola transición cara á neutralidade climática, proporcionándolles un apoio a medida. Aplícase en réxime de xestión compartida, no marco xeral da política de cohesión.

○ Fondo mitigará os custos socioeconómicos provocados pola transición climática, apoiando a diversificación económica e a reconversión dos territorios afectados. Isto implica o apoio aos investimentos produtivos en pequenas e medianas empresas, a creación de novas empresas, a investigación e a innovación, a rehabilitación ambiental, a enerxía limpa, a mellora das capacidades e a reciclaxe dos traballadores, a asistencia na procura de emprego e programas de inclusión activa dos solicitantes de emprego, así como a transfor-

mación das actuais instalacións con altas emisións de carbono, cando estes investimentos dean lugar a importantes recortes de emisións e á protección do emprego.

O importe asignado a Galicia ascende a 111 millóns de euros en termos correntes, a provincia da Coruña figura como unha prioridade dentro do Programa de Transición xunta. No seguinte mapa móstranse as provincias que reciben financiamento do programa:

Mapa 3. Provincias con financiación do Fondo de Transición Xunta



Fonte: Consellería de Facenda e Administración Pública

Todas as actuacións da prioridade da Coruña clasifícanse en cinco subprioridades que se describen a continuación xunto co seu importe:

Un 11,7% dos recursos destínanse á subprioridade 1: Transformación ecolóxica da industria e fomento da mobilidade sustentable, a economía circular e a eficiencia enerxética, cun importe de 13 millóns de euros


A subprioridade 2: Impulso á cadea de valor das enerxías renovables, o autoconsumo, o almacenamento enerxético e o hidróxeno renovable dispón dunha asignación de 17 millóns de euros. Isto supón o 15,3% do total

O 57,8% dos recursos destínase á subprioridade 3: Impulso a PEMES e proxectos empresariais tractores para a diversificación económica dos territorios, o importe ascende a 64,4 millóns de euros

A subprioridade 4: Fomento da investigación, desenvolvemento e innovación (I+D+i), a integración das TIC e a transformación dixital dispón dunha asignación de 10 millóns de euros. Isto supón o 9,0% do total

Por último, o 6,3% dos recursos destínase á subprioridade 6: Impulso a infraestruturas sociais, a economía social e iniciativas de formación e cualificación, isto supón un importe de 7 millóns de euros

Gráfico 5. Importe por subprioridade da asignación financeira do Programa de Transición Xusta 21-27 da prioridade da Coruña



Fonte: Consellería de Facenda e Administración Pública

